

吳興叢書

寶前兩溪志略

二



寶前兩溪志畧卷六

歸安吳玉樹靈樞氏編纂

祠祀

神之能禦災捍患祀之以報功也前賢往哲祀之以崇德也先王之所以合幽明而展誠敬其斯謂乎誌祠祀

后羿祠

在射村不知邇自何代明萬厯庚戌王西陵重建改名圓通庵

吳季子祠

在射村五代時裔孫吳剪由山陰縣奉父母避兵徒

居射村官後周宣教郎立祠以祀宋淳祐閒裔孫
文杲重修并置產以贍守祠明裔孫吳宗義重脩後
吳龍復修葺之春秋二仲月郡守檄縣致祭學政行
文給守祠生衣巾奉祀嘉慶六年詳請防護現在裔
充當守祠
主理祭器

〔宋〕淳祐九年章斯猶建祠碑記

吳文杲捨地碑記案明萬曆閒祠爲里民任氏侵佔
將宋淳祐二碑燬棄吳氏控官得
復其地

〔明〕胡鐸重脩季子祠記

延陵季子古賢人也流風所及百世下莫不仰止湖
治距東南一舍許吳氏世居其閒厥地號曰西吳南

吳而西吳土地祠故老相傳爲季子第一作墓宋淳祐

閒吳文杲者以苗裔故嘗發私帑購士民徐氏地蕩

一十六畝有奇以贍守祠歷元至國朝祠就圯廢成

化閒安素翁璋過而歎曰祠以依神今若此神將安

依由是麾廩聚材諏日肇役腐者新之卑者崇之隘

者闕之堂宇門廡竦然改觀祠有配像或以爲東魯

徐君蓋仍其舊而莫敢廢也旣而安素之子九淵君

復加葺治題其額曰西吳季子之廟余濫官于滁適

九淵君爲之簿索余爲文將紀諸石余惟事焉合義

俗所宜從祠而非淫法所不廢狄梁公毀淫祠而獨

存之良有以也且聞諸其鄉水旱疾疫必禱禱必應

而祠之前松楊大可十圍余以是知神之靈千載不
泯也吳氏世崇其廟豈直私親乎哉

吳時亮復西吳季子廟祭祀記

余遊延陵謁先賢季子祠祠之額爲嘉賢廟乃高皇
帝御賜後十年余治兵常鎮駐澄江其地有申浦者
季子墓在焉至聖所題十字碑屹然聳峙爲千百年
來遺跡每爲留連不忍去者久之乃吳興之射村西
吳祠亦相傳爲季子墓此何說歟惟是高風至德千
秋仰止先儒謂其才近伯夷讓如泰伯如春秋左傳
家語史記諸書所載百世下如見其人況三吳故地
神所往來陟降者哉然則季子之神雖家戶戶祝可

也而屬在苗裔能不竭誠致敬以奉之遠弗可考考
其近者後周有剪祖立建宋有文杲捨地我明有安
素祖之脩復西園祖之葺治嗣後爲無賴者所侵蝕
幾不可詰而一人倡義具族同心遂使廟貌聿新蒸
嘗載肅非神有靈孰啟之衷而贊之決耶憶吾先世
代有顯者明興以來獨以孝義甲諸大姓是猶延陵
之風焉邇來生齒日繁生計日誦吾慮孝義之不保
其終也又何敢遠稱讓國高風貽羞往哲哉願奉祀
者世世相與勗諸崇正四年辛未仲秋裔孫時亮

吳祿詩

至德相傳直到今隱微偏是人人深君臣父子兼兄

弟不負天倫不負心

〔國朝〕學政李際期守祠祭器行府檄

恭惟延陵夫子審樂辨風參夔佾之妙契知人達政
蘊康阜之宏猷倡讓位以化異日之爭傳不識其宗
臣憂國解佩劍以明當年之志史誤以爲俠士踐然
蓋遠紹太伯之至德下軼子臧之高風宜至聖之表
其碑也吳時倂准以衣巾奉禋祀一應祭田祭器該
府行縣簿錄飭守以昭恭敬繳

太守吳綺謁西吳季子祠詩

西吳亦是勾吳地魂氣何嫌之此都萬古交情留短
劍百年祀典寓生芻庭遺檜柏滋蔥鬱門有溪山擁

畫圖我在廣陵分一派溯洄雖遠不模糊

陽夏侯祠

在前溪鳳林祀漢陳豨明正統乙丑里人沈氏重建
天啟閒僧覺堂募修

祠有銅鐘明嘉靖閒再鑄不鳴有里人捨金環合鑄
乃成其聲宏遠勒碑紀其事崇正閒爲盜所劫去至
鳳潭鐘忽躍入水中盜懼而逸

明金梅社田碑記

鳳林土地廟迺漢將軍陳豨鍾靈之地禦災捍害誠
一方之保障也然非有田里以裕其基抑何以延廟
貌于不毀哉本廟旁有地田一邱世守不廢後因里

有木橋歲久而頽僧明珽見而患之奮然充拓石橋之志隱君張石泉慨施以爲眾人倡後不免虧一簣之功于是明珽不私所有逕鬻田以終其事田雖廢而橋則成僧之心亦無憾矣時嘉靖辛丑里有善士吳潮念吾鄉之所賴者存乎神神之所依者存乎廟而廟之所資者在乎田由是矢心竭力勸募于鄉以求復其田鄉人聞之莫不感焉不日復獲其田以歸于廟名之曰社田使僧無不給之憂廟垂不朽之業而吾鄉亦獲祐于無疆也里人謁余爲記爰書其概于石

吳時亮鳳林土地廟碑記

鳳林禪院在予里之西南隅相傳爲漢陽夏侯陳將軍豨封此爲土穀神故稱土地廟云廟不知創自何代但其後殿梁上題額尙存正統乙丑重整至于今蓋二百三十餘年矣神威顯赫爲一方保障予成童時卽隨先大夫百歲翁瞻禮此閒得聞同里先達嚴景荅公事神最虔恪夢神賜以錦帳是年果登第卽釋褐爲進士其名次適與夢相符神之靈驗類如此

己未予通籍後宦遊京師住僧覺堂廓然有大志請于先大夫廣而新之闢後殿之前址築三楹爲正殿移神棲于其中而後殿則供釋迦大士諸像立山門增置旁舍一切長生燈油田以及什物器皿次第脩

舉犁然完善而又出其餘力剏夏字圩之禪慧寺菁山之經堂庵皆覺堂一人締造之力而其徒養愚贊襄以有成者也故鳳林開山之功實以覺堂爲稱首自後予致政家居廟中事無大小靡不力爲護持又捨田以爲香燭之需而養愚之徒若孫悄然德鑑蓮芳輩亦皆勤敏恪慎梵唄鐘磬晨昏弗綴至于撐持禪林迄今猶無改舊觀者則蓮芳之功尤多焉數十年來覺堂年老而逝養愚悄然相繼淪沒德鑑亦病不能起蓮芳最後年逾六十子年九十有三則衰且耄可知矣一日者蓮芳進而請曰鳳林禪院之賴公庇廕也垂六十年公今壽躋期頤而蓮亦日以衰邁

恐後之嗣者不能恪守清規俾先祖覺堂拮据叔造
之艱一旦廢墮用是惕焉茲懼願公賜一言以勒之
石以垂不朽并將田畝器具誌之碑左昭世守焉予
深嘉其志遂濡墨而記之

〔國朝〕吳靜詩

將軍百戰勳名盛代北長埋萬古冤借問空庭誰屬
耳漢家廷尉少平反

吳穀北行憶鳳林舊遊詩

鳳林春賽夕陽邊禪室頻來借榻眠惆悵昔遊難再
問靈祠簫鼓自年年

吳芳綺鳳林禪院訪王東廬詩

桑柘連村暗聞鐘到寺門斷橋人跡少籬落鳥聲喧
把酒無多酌題詩好細論只緣歸路近小住話黃昏
徐公祠

在寶溪西庄田祀東魯徐君

文昌閣

舊名魁光閣

在前溪明萬厓閒吳世治捨地勅建上供梓潼帝君
下供漢壽亭侯像 國朝乾隆閒重脩前後兩殿增
素總管祠

清溪南注前溪西環二水會合閣當其中菁埭諸峯
俯仰揖拜于几席閒兩溪閒一勝景也
里人稱溪閣
晚眺列入勝
景

國朝吳允詩

小閣憑欄思浩然窗開遠入暮秋天遙山飛翠晴猶
濕野墅眠雲雨亦妍禾黍青黃迷古渡檣帆隱見轉
前川何來金鼓聞喧笑可是農家賽社還

關帝祠

在通輿橋北岸明洪武閒建 國朝乾隆閒陸暢敘
詞里人重建

總管堂

在通輿橋北關帝祠旁祀護國隨糧王金總管

明李祐睦州建昌祠碑記元季搆兵李文忠平之有
人馬旌旄擁從前後空中語曰金元七總管也李公

上聞敕封利濟侯立祠祀之

案神蘇郡人金姓名元七見庚巳編聞之巫祝家云神元季人金姓名萬一封護國隨糧王子元六元七封順濟侯利濟侯

計大明王祠

在前邱神姓計爲前溪土穀祠晉時敕封清溪里域咸平侯妻息氏封眞靜夫人每歲八月十三日爲神誕里人以麥粉作犧牲狀以祀

太均殿

祀宋兵馬都監陸圭神歸安人熙寧間以祖廕補官尋調都監宣和時嘗發私帑賑饑適方臘弄兵鏖戰

而卒遂爲潮神紹興閒海濤衝激江岸見神役陰兵潮遂平嘉定閒飛蝗蔽天神見雲端驅之淳祐閒錢塘大決神與三女揚旗空中浮石江面堤遂築帥臣徐棗以其事聞于朝賜廟協順爵曰廣靈侯妻姚氏封花錦夫人三女封顯濟永濟通濟夫人宋文及翁作廟記今里俗爲宜男之神祠中有如姑射神者提攜孩稚幾十數士女祈子者輻湊而來或竊神鞋應則倍謝產婦彌月咸祭之謂神能保產多乳或以大碗覆于神前爲乞乳

里俗或有生子女繼爲神齋改呼陸某者足爲一笑

正月

十一日爲神誕祭賽如市又清明後一日俗呼爲黃

明日其祭賽尤紛紛焉

案俗稱三濟夫人爲三殿太均未詳其義或謂均當作君或謂神靈顯應正直均平故稱

一在寶溪東嶽行宮西明景泰閒建 國朝乾隆閒住僧募眾重建

一在前溪法華庵西 國朝乾隆閒吳氏重建

費公祠

在射村祀宋學士文端公費若今廢

戴公祠

在射村鹿苑寺祀宋歸安縣令戴融公于天聖四年以太常博士知歸安縣事蒞任未期大治先是邑民困于茶賦公乃籍數之多少第戶之豐乏審地而均

其課民困以蘇崇禮長壽二鄉

今射村以西屬長壽岳廟灘以東至前邱

俱屬崇禮

案府縣各志名宦傳俱作

民多澤居不

崇禮萬歲二鄉萬歲想卽長壽之原名

務稼穡公以禮法諭之遂革舊染未幾內召二鄉德

之立祠以祀

案府李志名宦傳作戴融職官表并縣志俱作題誤攷戴融係六朝人曾遊湖

州顏魯公抒山詩云
旁瞻戴關路是也

府勞志戴公生祠碑宋都官郎中張先撰

縣志立祠射村永福寺

案永福寺當作永興寺

胡公祠

在射村祀宋胡咸并廣西帥胡舜陟今廢

宋胡舜陟丐祠射村感皇恩詞

乞得夢中身歸樓雲水始覺精神自家底峭帆輕棹
時與白鷗游戲畏途都不管風波起 光景如梭人

生浮靡百歲何妨盡沈醉臥龍多事謾說三分奇計

算來爭似我長昏睡

此詞漁隱叢話吳興藝文補選之皆直書舜陟作花庵黃氏辨

爲舜陟子胡仔作閔元衢復辨爲黃氏之誤

案胡咸本績溪人字誠甫游太學十餘年謝病歸其
子舜陟舜舉相躡高第從典大州累贈朝散郎建炎
四年八月辛亥以疾卒于家年八十一子四舜陟舜
俞舜申舜舉紹興元年五月丁未葬于安吉縣之原
見汪藻胡君墓誌銘舜陟詳人物

吳氏家廟

在前邱東塢明初吳璋勗建于前溪北岸嘉靖閒吳龍遷建今所中爲如在堂永思堂東爲綏祿堂西爲衍慶堂共二十九楹崇正閒吳世裕吳時亮相繼增聖諭軒東西廂房左右碑亭 國朝雍正閒增建愛敬堂五楹傳經樓五楹蔣璠朱國楨俱有記

明孫存詩

道場山前發雙棹法華庵東見新廟廟貌有嚴清風揚司空寫出吳君孝吳君甚孝翁甚慈大書堂額永其思永思堂下種青柏安素墳前生紫芝紫芝眉宇投閒早前邱卽是蓬萊島麟兒頭角兩崢嶸蘭孫手掌多文藻君撫兒孫更慕親每推親意及宗人有田

寶六
供祀亦周急延陵以下皆欣欣已有雄文勒金石君
之雲祢保無斃春雨秋霜歲月深種來柏樹應千尺
吳龍永思堂落成詩

一生拙宦苦奔馳俯仰徒懷烏鳥私合族有心成好
會明禋無地展哀思親栽松柏森新廟遠紀勳庸續
舊碑瞻拜豈能忘對越容聲恍惚足追惟

寶前兩溪志畧卷七

歸安吳玉樹靈圃氏編輯

人物

寶前兩溪間故老相傳宋時有梁夏倪高葛五大族又施氏與倪氏相埒同居射村之西吳明時及國朝初列博士弟子員者尙多前邱馮氏亦稱巨富元末助餉守郡城洪武間有馮璋者以饒貲籍家今射村猶有梁夏浜高家汰地名惜其事蹟竟莫之攷興廢無常古今同慨故述所見聞俾後人知先輩儀型足動觀感誌人物

五代

高士吳諱頊山陰人因避兵徙湖州射村性恬澹好書

史與吳珙吳崧皮光業林昇羅隱何肅韓必隱于長

興八座山時號八友

西吳里語高士韓必吳崧鍊丹于長興洛塢吳越王錢鏐遣羅

隱招之二人遂隱一石壁今二仙石壁尚存

子諱翦孫諱黨字昌遠孝友

醇謹賑卹鄉里累有隱德後徙嚴州之淳安里人感

之築橋以祝東橋曰懷吳西橋曰思吳端拱元年仕

建德監倉卒于官子諱漣登宋乾德三年進士六世

同居人稱義門

宋

僕射何奩字文縝兄棠弟桀竝有文名時號三鳳公登

政和五年狀元擢祕書省校書郎遷中書舍人兼侍

講徽宗時或論公與蘇軾黨出知遂寧府已而留爲御史中丞論王黼姦邪專橫十五罪繼上七章及其黨胡松年胡益等俱罷公亦出知秦州欽宗立復以中丞召爲翰林學士進尙書右丞中書侍郎時議割三鎮和金公論辨不已帝頗悟又請建四道總管使統兵入援以胡直孺王襄趙野張叔夜領之兵旣應而唐恪耿南仲聶昌堅主和亟檄止之公解政歸俄以資政殿大學士領開封府尹金兵長驅薄城下帝罷恪相拜公尙書右僕射始復三省舊制時康王在河北公建議請以爲元帥密草詔橐上之乃以康王充天下兵馬大元帥陳遘充兵馬元帥宗澤汪伯彥

充副元帥京城失守從幸金營遂留不返既而議立異姓金人曰惟何棗李若水毋得預議公以既陷朝廷仰天大慟不食死年三十九遺詩云人生會有死遺恨滿乾坤建元初訃聞尋得死狀乃贈大學士官

其家七人

案湖錄作井研人徙居寶溪宋史并東林山志作仙井人

尙書倪思字正甫乾道二年進士中博學宏詞科累遷祕書郎尋兼侍講孝宗時諫請諫官同宰執宣引庶得從容論奏上稱善光宗久不過重華宮公疏十上會上召嘉王公言壽皇欲見陛下亦猶陛下之于嘉王也上爲動容時李后預政公進講姜氏會齊侯于樂因奏人主治國必自齊家始家之不能齊者不能

防其漸也始于褻狎終于恣橫漢之呂氏唐之武韋不但魯莊公也上悚然韓侂胄與史彌遠擅權公攻之尤力累官禮部尙書寶謨閣學士生平剛介不苟合自言與爲有瑕執事甯爲無瑕從官卒諡文節生六子祖仁祖義祖禮祖信祖智祖常祖常有最良譽防禦使孟宗政字德夫有膽力開禧二年金將完顏董犯襄郢率義士據險邀擊奪其輜重吳獵奇之金人圍棗陽公午發峴首遲明抵城馳突如神金人駭遁金帥賽不擁步騎復圍公與再興合兵角敵敗之歷三月大小七十餘戰身先士卒隨方力拒再至再北又合許國兵敗金于白水次年金訛可復擁擊子手

圍城隨計設備禦之冑戰凡五十陳殲金兵孥子手
十七八奪印十六紐訛可棄帳走獲輜重牛馬萬計
軍聲大振遺民來歸籍其壯者號忠順軍出沒唐鄧
閒威名震境爲一時名將子璟瑛瑋璋

安

縣志載公隨州人徙居歸

魯國公孟珙字璞玉勇而有謀歷事寧理兩朝任京湖
大使父知襄陽時命公代統忠武軍取閒道劫金營
破砦十八斬首千餘級大獲軍器以歸紹定六年元
將那顏倂蓋追金主完顏守緒武天錫乘亂聚眾二
十萬爲邊患公逼其壘一鼓拔之壯士張子良斬首
以獻金人攻呂堰追擊敗之進逼大河金人棄輜重

走獲斬甲士牛馬無算鄧守移刺瑗降盡獻鄧地順陽令季英亦以縣降由州安撫張林以州降連破石穴等砦金將武仙與五六騎奔降其眾七萬獲兵器無算端平元年破蔡金丞相烏古論栲栳降殺金元帥兀林得金鑑寶玉金銀璽印牌還上曰卿名將之子忠勤體國破蔡滅金功績昭著詔授都統制賜賚甚厚嘗勸平堰溉田十萬頃使軍民分屯邊儲豐芻公忠貫金石軍民愜服指授方畧發兵深入所至以捷聞端平六年初所招鎮北軍駐襄陽李虎王旻亂鎮北亦潰公歎曰三十年收拾中原人今志不克伸矣病遂革九月朔大星隕于境聲如雷越日遂薨特

贈少保三贈太師封魯國公諡忠襄廟曰威愛其學
邃于易六十四卦各繫以辭名警心錄號無庵居士

案宋史作魯國公經
義考作吉國公誤

高士胡仔字元任家本績溪父舜陟爲廣西帥忤秦檜
死公以父廕授迪功郎轉奉議郎知晉陵縣乞歸自
號茗溪漁隱閉戶讀書留心吟詠取古人詩考之傳
記作叢話百卷詞林稱其博雅今其遺址俗呼胡家
墩云

太守葛勝仲字魯卿丹陽人登進士第歷太常卿續修
太常因革禮春宮建以公兼諭德獻仁孝學三論復
採春秋戰國以來歷代太子善惡成敗之迹日進數

事詔嘉之徙太常少卿歷顯謨閣待制宣和四年出知湖州六年移鄧州朱勔先求白雀之屬公不與至是媒孽其短罷歸建炎中范宗尹爲相凡前日以朋附罪貶者咸赦還公復知湖州時金人蹂江浙聲搖諸郡劇賊邵青欲道江入湖公修城郭閱士卒作戰艦賊知有備皆引去歲饑斗米踰千錢餓殍相枕公大發倉廩又輸已粟數百斛賑之民賴全活紹興元年丐祠卜居歸安之寶溪紹興十四年卒贈太師諡

文康

案公父書思祖密俱進士子立方孫鄰

少保葛邲字楚輔以廕授上元縣丞隆興癸未舉進士除國子博士輪對論州縣受納及鬻爵之弊孝宗獎

論除正言首陳征榷歲增之害願明詔有司茶鹽酒
稅比原額已增至一倍者毋更立新額上特召復令
條陳公以六事對皆切中時病光宗受禪除參知政
事勸上專法孝宗上嘉納紹熙四年拜左丞相專守
祖宗法度薦進人物博采公論惟恐不聞除少保致
仕卒諡文定配饗光宗廟廷

高士賈收字耘老烏程人慷慨好義嗜詩酒喜交遊愛
寶溪清遠築別業于溪之陽時人以陶元亮目之東
坡守郡時每念之過其居作古木怪石以贈遠近名
彥無不蹤其門者從孫安宅字仁居大觀三年狀元
年僅二十二歲授校書郎累遷戶部侍郎建炎間爲

給事中封駁無所避厯事三朝累司文柄貢舉得人
徽宗嘗手詔獎諭之子選詳明典故通曉法理官刑
部侍郎

司諫施元之字德初以文學著聲試館職除起居舍人

遷左司諫註東坡詩四十卷子宿

案郡邑志俱作長興人而施氏子孫

相傳世居寶溪以長興籍應試故入長興邑志

提舉施宿字武子克承家學尤留心金石慶元初知餘
姚縣市田置書以教學者邑北瀕海歲役民修堤民
苦之公築石堤建莊田二千畝以供修堤之役民德
之厯任會稽通判朝散大夫提舉淮東常平倉

寓賢富直柔不詳何許人寓居寶溪呈葛魯卿陳叔易

詩云青衫短薄汝陽天鶚牘當時誤薦賢承乏西樞
了無補還依丈席聽章編洛陳花骨巧裁詩曾把梅
篇薦玉墀來說他年調鼎事只今身已鳳凰池陳君
談論席生風段子文調氣吐虹參木腴腴皆入篋知
人誰過葛仙翁

自註陳名恬段子拂

讀其詩可想見其人

元

高士夏文彥字士良號蘭渚博古好學家藏名蹟鮮有
比者鑒賞品藻萬不失一取名畫記圖畫見聞誌畫
繼錄續畫記參以宣和畫譜南渡七朝畫史五代唐
宋以來諸家畫錄及傳記雜說百氏之書搜潛剔祕
網羅無遺自軒轅至元共得一千五百餘人命曰圖

繪寶鑑錄楊維禎序之又創前人所未發立神妙能
三品論畫苑奉爲規範云

提領吳諱康號水村元至正間舉賢良方正任南宮提
領內諧宗族外睦閭黨創修族譜慷慨好義素抱經
濟之學與金華宋濂稱忘形交後宋公應明太祖召
致書薦公而公已歿

吳興郡公孟滔字君復號能靜宋節度使興孫父之緡
官至尙書公以父廕官至太守贈吳興郡公諡康靖
幼強記號爲奇童喜作詩有衡湖集

明

平涼侯費聚字子英曾祖熙父得興商賈于臨濠至元

未爲盜所劫公扶柩于濠遇明太祖起兵遂從焉與
耿炳文由廣德取長興授永興翼副元帥張士誠遣
潘原明來寇公獨追至鎖荅橋大敗之召回領黃旗
軍李伯昇大舉入寇太祖以長興兵少復命公率廣
德安吉兵應援擊敗之進永興衛指揮同知丙午克
湖州平蘇州改指揮使及平關陝陞都督僉事鎮守
平涼洪武三年封平涼侯歲祿一千五百石予世券
子超戰死璿以人材舉官孫宏累有武功俱徙居五
河茲不詳載案明史作五河人府志名宦傳作世居
歸安射村祖大均父得興俱以公貴封

平涼
侯

府判孟道夫君復子也博學多才性謙異能寫竹時人

珍之以舉薦任應天府通判有政聲

處士吳謙字宗益號松菊端方嚴重不苟言笑推惠鄉里或忌其能譖諸官舉爲糧解公弗辭正統景泰閒

屢輸賑饑例授官辭之朝廷嘉其義赦免差役旌表

義民弟宗義

明史孝義傳誤作歸善吳宗益宗義康熙歸安縣志宗益誤作宗孟

承事郎吳諱立字宗義號西疇疎財仗義事親以孝謹

稱正統景泰閒屢輸粟賑饑授承事郎又出粟二千

石白粲六百賑饑例加官辭之同兄宗益乞移榮故

父朝廷允之特旌孝義年八十五卒子諱璋克承父

志益敦孝義成化閒出粟六百石救荒授七品散官

又嘗割股以愈母疾施棺施藥設義冢創義塾修橋

梁道路凡義舉皆力爲之宏治癸丑歲歉復輸金千兩有司以聞特賜璽書旌表父子孝義又散粟四千石于鄉懇陳當道蠲租賦約萬計里人立德惠碑于鹿苑寺張濂記之

太僕吳龍字九淵號西園性剛毅敦名節直諒慷慨官太僕寺主簿遷零陵縣知縣乞養歸增築家廟修輯家譜設義學廣義冢嘉靖三十四年海倭徐海率黨由松犯嘉湖公散金募鄉勇溪港要處多方設備俟倭至輒灑淤泥赤豆於倭舡并岸灘之際倭皆不能上岸暫立又揀壯銳者乘小舟各持強弩奔射出入溪港若飛倭稱爲鐵胡蜂不利而遁德清烏程歸安

皆賴以安後塑像泗水庵

廣文吳應芳字文譽父任光祿丞諱鳳字九韶代有隱德公其冢子也分鐸江陰獎篤行斥浮薄賑貧賻葬卒于官士民哭之失聲奉祀名宦

布政陸綸字理之號南洋嘉靖丙午舉人庚戌進士授刑部郎任四川布政事父至孝于昆仲閒尤友愛焉持政寬平去苛法折冤獄署兵事以大義激三軍軍民稱頌不衰謝病歸旦夕課子一介不取每徜徉山水有會心處輒忘返焉卒壽八十有四

濮州守吳應穆字文衡嘉靖舉人授濮州守濮故瀕河賦繁民訐會高唐以浮糧嫁額于濮至驚上聽幾聚

寶七
揭竿公力陳之當事遂仍故額民賴以甦民有谷姓者妾夜爲人刃他讞者坐其罪谷之備傳某獄已成公得眞盜脫傳于幽室蒞任朞月威惠畢殫兄應和字文節號道南強直不屈篤學善文

靈壁令吳仕讓字允恭性倜儻善詩文書法虞楮自號三吳墨卿嘉靖戊午舉人授靈壁令先是邑大水鬻城下民徙鄰壤者十室而九公至卽白上司蠲賦親自弔慰民遂返壬午復患水如初公周視地宜疏渠原野邑賴以安

郡丞吳仕昂號馨葵有蛇百餘見于室而誕公萬厯辛卯舉人選邵陽令尋陞寶慶郡丞署郡篆一年訟者

無留獄時有隆回洞蠻出市殺人遠近騷動公單騎
往諭蠻泣感納款旋以忤璫乞歸壽七十四舉鄉賢
大賓

莆田令嚴廷儀字景若父汝麟嘉靖戊午進士任榮府
長史公萬厯壬辰進士任莆田令孝友克敦經濟夙
著妻陸氏布政南洋公女也性貞靜不苟言笑善詩
文翁姑妯娌嘗誣其短氏仍孝敬如故人咸敬之後
爲妯娌所害公適省親歸里亦死于家難

高士吳夢暘字允兆號北海強直不避權貴工詩古文
雄長詞壇兄弟五人公居最幼有誣叔兄殺人者辭
連諸仲郡丞下令捕急將收其孥公挺身見丞辨誣

狀得釋遊長安與宋忠甫張聖標李如松交時如松督兵朝鮮聘公爲參謀復所侵地倭遁去于是海內

賢豪爭交于公時人以公孝友類姜肱義類魯連詩

類高岑言論風旨類林宗云

明史文苑茅坤傳誤作夢陽

鄉賢吳世裕字伯順號沖陽父贈中大夫諱仕謨號豐原救濟戚里不責報者幾千計公一承父志敦本尙義萬厯戊申己酉閒出粟首倡賑饑築城墉建水柵繕祖塋掩骼埋齒恆殫力圖之壽百歲子時亮

六安守吳世濟字楫侯萬厯壬子舉人任太和縣令時流寇猖獗公築城浚池鄉城聲援親冒矢石殺賊首紫金梁眾宵遁城賴以全 國朝乾隆庚辰崇祀太

和名宦

少司馬吳時亮字元亮號訥如晚號止庵萬厯進士天啟閒督學山西時中外頌璫功德建祠太原守及諸縣令效之公曰媚璫以保富貴如物議何守正得禍未始非福璫祠遂已崇正閒敕整飭江海一帶兵民勦捕倭寇海盜節制巡撫操江等官督運軍餉歷任廣東布政司使陞南京兵部侍郎以親老致政拓宗祠修宗譜族人仰之壽九十七

高士吳磐字大雍號桐江才抱經濟學貫百家與張天如楊維斗韓求仲倪鴻寶黃石齋凌荅柯諸名士交好庚辰歲饑公策救荒十二議上之軍民全活無算

寶七
流寇分掠山邑郡守聘公爲籌畫崇正閒以經濟召
再徵不赴著作數十種兼工行草書得之珍如拱璧
秀才吳子方父世濟公兄弟五人兄子向棄儒就墨弟
子易早卒各遺孤寡無所依公與同居篤愛無異己
生宗黨稱之

寶前兩溪志略卷八

歸安吳玉樹靈圃氏編輯

人物二

國朝

鄉賢吳諱世祺字濬吾號樂羣年十五父大參公卒于官扶襯數千里歸葬孝友著於鄉里生平慷慨好施崇正閒歲饑出粟賑濟全活無算凡濟困拯危等事不可枚舉時值鼎革屢爲盜所執不屈盜伏公仁義以金杯勸公酒公卽取擊盜喪二齒餘皆股栗公獨肅然以大義申責羣盜無敢仰視者兩舉賓筵壽八十臨終時語曰徹爾我之藩不絜而自平晰是非之

極不同而原合我子孫當日誌之孺人顧氏多才斷盜既劫公復將劫孺人一日盜突至孺人衣敝服執箒大呼曰我太孺人不見矣直入盜伍中作尋覓狀盜不得而去後盜覺復至孺人登門樓侍婢環列孺人語盜曰我有婢善弩發三弩汝能避當以金銀獻盜魁皆畏而不前孺人整衣端坐言語從容盜懼而退

處士吳諱時宣字元爽號湛存敦厚有至性順治丙戌夏羣盜蜂起公弟被執公傾家贖之後又執公父至是已三被劫家貲無一存矣公挺身赴盜窟號泣請代盜爲動容遂釋父歸與凌忠介溫寶忠友善人稱

吳中三君子寶忠殉節新安公走千里扶輿歸里往
返六月任勞任費鄉黨推篤行焉韓純玉作吳中三
君子歌以紀

鄉賢吳時憲號念因少負雋才不慕進取精心於濂洛
之學著有性理闡幽八卷學者宗之雍正六年崇祀
鄉賢

員外郎吳景亶字嶧山公幼警敏舉崇正庚辰進士任
新昌令值流寇猖獗躬擐甲冑修築城垣鼓勵義勇
擒獲嚮導四境保全撫按交薦擢禮部主事去任之
日捐千金輸地方逋糧陞員外以親老致政士論惜
之

進士施鉉博通經史嗜學不倦順治辛卯舉人癸亥進士由射村徙居桐鄉卽入籍焉

太史吳光字迪前號長庚曾祖世治任建平令有強項名公舉順治辛丑進士殿試第三授編修甲辰分校禮闈康熙三年命公冊封安南相見正天朝禮卻餽遺風節凜然使旋命纂修孝經衍義卒于官泰安牧吳曙字峙青號芸齋父鄂字韓堂有隱德公舉康熙己丑進士授商河令濬治七十二窪苦積潦者皆可耕治邑之荒黃莊有盜拒捕公單騎馳往擒其渠魁赦其脅從探丸絕跡擢泰安州牧懲豪強嚴科派州徵漕萬石往例皆民運公募車官運減耗米以

給車價民深德之

太常卿吳隆元字炳儀號易齋弱冠魁于鄉康熙甲戌
進士選庶常改授大名令調濟河令皆以廉能著高
安朱文端公特薦之補會攷府主事歷郎中擢侍讀
學士教習庶吉士屢典文衡轉僉都御史大理少卿
調太常少卿公天性耿介不避權貴人皆以海忠介
目之文章鎔經鑄史卓然老成篤志經學尤邃於易
著作甚富

州司馬吳諱啟褒字我錫號峩雪十二失怙事母至孝
稱弟甫七歲友愛彌篤天性醇良好善樂施營同堂
伯叔昆季十餘櫬竝置祭田乙亥歲荒公屢請當事

得邀賑濟并蠲免錢漕萬計鄉黨稱之兩舉鄉飲固
辭不赴日誦經史百家至老不倦手自繕寫不下數
百冊三教方書無所不通柯南陔以千手眼大士呼
之壽八十四著作饒富詳著述

澈浦令吳大煒字青然號兢齋康熙丙子舉人重宴鹿
鳴壽八十五初授澈浦令時適鄰黔陽有傅氏婦因
姦毒死其夫之父及兄子事三年未決公攝黔陽廉
得其狀審出之爲抵誣告者罪人稱爲神後以不稱
上官改東陽教諭

廣文吳履中字爾立號全夫穎敏篤學雅貫百家古文
制藝世所推重登康熙戊子鄉薦授仙居縣教諭日

與諸生講濂洛之學自號醒世道人卒于官士人哭
走千里執紼送至家著作饒富詳著述孫坊字封三
號壽谷孝友剛直淵博經史人叩疑義必覈確而告
四方宗仰或不遠數十百里來就學者晚年洞覈程
朱著有家訓二卷

孝廉吳曉字曉人號問庵篤行善文人咸謂公文有賈
董之醇茂韓蘇之海潮一時奉爲模楷尤善奕入能
品康熙丙午舉人授教諭

孝廉吳晟字卓人康熙丙子舉人性瀟灑無俗嘗慕松
之孤潔取崖之于世無所用自號松崖居士日以琴
書自娛閉戶吟詠著作饒富

高士劉舜俞長興人尙書公麟之後高志逸才弱冠卽
博通墳籍諸子百家罔不窺見補弟子員後歸隱于
西吳之餘溪閉戶著書講學不輟與松崖子輩相唱
和後復翩然有遺世之想焚香趺坐唯與高僧相往
還遂入山不知所終

御史吳鳴虞字集三號蓼村康熙甲午舉人甲辰進士
授工部主事尋陞監察御史奉 命賜四品服往四
川總理丈量公不避權貴不避寒暑躬親履勘私佔
者悉以還之蜀民咸大歡悅立碑銘其功烈年八十
八

明經吳逢泰字霖蒼號樗全厚重少言以績學名于時

而于見義尤勇念族屬有貧不能從學者公慨捐腴產約千金爲義塾計又倡立祧廟撫孤濟貧里人頌其功德不倦

處士吳文奇字頌音性簡質慷慨公父啟正字克存沒後有遺貲貸于人者約八百金公悉取券火之曰豈當留此爲子孫斂怨乎人咸重焉

封公吳智字錫其父光以編修家居時嘗以數百金置里中令貧民夏質絺衣冬以帳易不取其息及父卒家貧召鄉人悉還其衣帳論者賢之子大受

太守吳穀字朔占號泯懷康熙辛丑進士由吏部郎中出知思南府歷岳州武昌廣平宣化所至政績推重

一時樂施好善修輯族譜鄉黨皆感其惠

郎中吳聯珠字珍茲舉乾隆丙辰進士歷任刑部郎中
典雲南鄉試後以母老絕意宦遊家貧至孝營同堂
伯叔兄季十二櫬宗黨義之

太學吳諱升恆字得天號杏園孝友敦謹慷慨好義嘗
改造房屋有請讓地者公慨然自縮界與之曰我天
井陘隘何害倘以尺地起爭非睦鄰之道恥勿爲也
有張姓者時貸公米其子竊米數石鄰人偵得之以
告公公置不問張聞之感愧後家廟所藏古罇被盜
張適爲捕役水手二日卽得盜曰吾所以報公也鄉
里借公財粟而貧乏者旣還其券且燬其簿曰無爲

我子孫責報遇凶歎倒廩以貸不能婚葬者傾囊助
之後以家計益艱寧自刻苦不稍易行遠近百里婦
人孺子皆呼慈佛年六十四卒哭弔者盈戶有哀慟
動于形色者

太史吳大受字子情號牧園雍正癸卯進士以檢討典
試江南四川督學湖南丁母憂後不作宦遊計時張
相國以科道薦薄通政以經術薦俱以疾辭

鄉賢陸汝詠字暢敘一字靜齋耕心其晚號也爲人朴
直端方慷慨好義賑貧乏施藥棺恤鰥寡孤獨見道
路橋梁僧刹道院之傾壞者輒解囊營之無吝色其
族屬朋黨沾其惠者尤多

進士吳芳錡字蘋薌號馨白登乾隆乙卯進士家貧篤
學夜讀不輟夏夜坐蚊廚中執香火觀書習以爲常
羣書無不觀覽更邃于經竇東臯諸名家皆以十三
經異同字句推服同族坊字封三變字丙之皆邃學
經史遊其門者以百計與公人稱三如來云公兄芳
鎮字虛益乾隆甲午舉人博學善文族兄蘭庭字虛
若與鎮同榜亦博古稱時人號大虛小虛

廣文吳元會字東垣號浣初乾隆辛酉舉人乙丑進士
屢任溫州衢州金華府教授仁慈謙和敦謹不苟雖
狂暴少年見公靡不傾服歷官二十餘年所至士民
咸稱其德翕然無異詞

寓賢陳庚先本楚人流寓前邱性豪俠善劍術力舉千
觔喜吟詠不求聞達或云爲知己殺仇人遂隱于吳
不復出吳景凱贈詩云客路王孫草正芳征衫溼處
水雲涼影孤有雁迷蒼渚音斷無魚到武昌一劍知
心成密友九疑入夢隔他鄉卜居近在柴桑逕我欲
行歌學楚狂

太學吳長齡字卜年敦謹不苟言語沖和人見之如坐
春風中壽八十四授八品散官

寶前兩溪志畧卷八

寶前兩溪志略卷九

歸安吳玉樹靈圃氏編輯

藝術

術技之道末矣六藝與六德竝稱醫卜圖繪不與焉而聖人不廢龜筮古皇著有方書六書首于象形其圖繪之源歟技雖小精之亦可以通神明參造化烏敢略諸誌藝術

明

指揮吳鶴字九皋號松軒工詩詞善書有二王法帖百韻歌赤壁賦石刻菱湖南聖堂碑記均公手筆也

郎中吳仕詮字公擇號湧瀾萬厯甲戌進士授溧水令

新學宮修邑志輯族譜尋陞南京兵部郎中喜奕性豪放與臧懋循友善賦詩酌酒以敲枰爲樂後罷官居家奕名益著爲南都國手築室于故讀書處顏曰攝庵人稱攝庵先生

高士吳筠字在茲號青士晚號魯庵少工詩文彙甚富怡情圖畫青綠宗李將軍潑墨出入二米晚年自立門戶花草人物色色俱工壽八十

處士吳喬號松濤善花鳥宗黃筌尤精草蟲嘗以淡墨點峽蝶輕盈可愛

文學吳時震字季方號補齋孝廉羣玉公季子也詩書兼美尤善摹印畫宗荆關時閒小米詩選入同岑集

詩觀

秀才吳子向號更生弱冠補諸生中年棄儒就墨精于醫學著有傷寒五法集註李保泰序之

國朝

處士吳景周字蒞周號硯叟工花鳥人物每以淡墨渲染傳神宛肖

太學吳景鵬字公端號飛濤博雅善文工山水蝴蝶名振京都孫侃字樂亭性灑落亦以蝴蝶稱計蝶一翅人以白金一笏換之不輕與時有金蝴蝶銀山水之目

秀才吳景振號耐溪善書銀鈎鐵畫柳骨顏筋有學字

訣四卷

明經吳標字南英號枝巢中雍正乙卯副車前後十六試于鄉無一遇嘗就家塾進子弟之務學者誨之孤寡尤甚喜寫松石筆力扛鼎墨透絹素非宋元閒之輕薄筆所能同語也

高士沈珠霖字綠田工詩詞精於篆刻初用切刀法晚年變走刀蒼古遒勁足徵名家採經史子集壽字者一百二十句篆之爲上壽印譜識者珍之又精六壬奇門之術晚號九魔子著有六壬辨說巴辭草奇門心法

明經吳最良字季常因白眉自號眉公未冠補諸生舉

明經精醫學好藏書尤善六壬時有鄰婦難產者求
卜于公公曰產婦牀上有物中空外圓晝隱夜出乃
燈籠也棄之卽產卜者歸取出婦卽分娩公造一舟
卜之曰十年後此舟當毀于眾人手後十年舟人夜
泛無火鄉人疑盜毀之一日有友謁公時沈綠田善
六壬亦在席公謂綠田曰我心動爲我卜之綠田謂
友曰君囊中有物官符乘于朱雀當爲印券必遭大
殃公又卜之曰是火也友驚懼不已公曰數定矣無
可逃也越三日果如公言著有醫學纂奇四十卷六
壬彙纂十巨冊

處士吳鶴鳴字聲聞少年力學精醫術十三科無不手

纂參以議論繕寫成帙

處士吳啟績字念曾得鶴鳴之傳兼通內外諸科仲弟
早逝撫孤寡與叔弟同居至老不分爨人稱篤行

處士吳蓉字暎然號隱髯善篆刻尤長于書與鍾禮友
善初學孟頫晚年變其法尤爲奇峭

秀才吳焜字鵬初善摹印工詩文著作饒富

秀才吳名晉字康侯號改軒家貧至孝性廉介不苟取
與善書楷法鍾王出塵絕俗行草出入黃米更入化
工又喜畫葡萄筆墨精雅

處士吳二同字少德號少室山人精于醫回生起死遠
近德之尤能審音律自訂宮商曲譜甚精細

處士吳名惠貧無担石事父至孝以賣水給養人咸以挑水官呼之每于山林僻處輒大笑聲震林端精六壬風角天之晴雨歲之豐歉往往奇驗一日沐浴不食而逝

處士沈佩蓮字虛舟號希周善畫人物學呂海山筆法瘦勁鬢髮鬢鬢呼之欲出尤善傳容嘗以淡墨渲染形神逼真家貧孝友年四十而卒

處士吳履易字素行博通經史更邃于春秋好臨池得歐柳法中年習醫遠近欽仰著有傷寒辨論等書

寶前兩溪志畧卷九

寶前兩溪志畧卷十

歸安吳玉樹靈圃氏編輯

釋老

二氏之道吾不知也然其閒逃名隱跡固多偉人
凡近於幻術頑空概不採錄其有裨於風教者存
之勿責余掛漏也誌釋老

明

蓬頭僧不知何許人住法華庵耕田自給不事佛經營
于水面取黃菜葉作餐或笑之僧曰黃菜葉只要飽
若要好討煩惱一日遍辭里人示期坐化顏色如生
異香遍里啟其榻有貝葉一張上書梵字

國朝

淨慈獅子吼寺僧有戒行後住金粟以煩雜退歸居禪
慧寺寺甚荒僻師居不數月蒔花薙草修整一新儼
然一古叢林也壽七十圓寂時遠近如聞異香

沿齡鹿苑寺僧族姓徐自幼不茹葷喜禪理十歲入寺
受戒終日禮誦無他事設放瑜伽餓口極有奇驗乾
隆閒菁山毛蟲食松葉爲害邑中仕宦塋墓多半在
菁蔭木幾食盡而無計除之有宦者謁師請除師固
辭請益虔師遂往焉設放餓口一壇比明蟲皆墮地
大小成毬而死三日墜盡又有費某家患怪飛沙拋
石放火跌人無所不至乃請真人府法官驅之不克

尋遁去遂敦請師設放餒口竟貼然不復擾矣壽七十餘而逝與羽士沈一炳友善

以上釋氏

唐

馬湘字自然杭人常遊湖州以醉墮霄溪經日方出坐
水上衣履不溼每賒酒白塔巷酒肆一日謂主人曰
我得仙矣酬爾酒價出囊中藥投鐵器竝爲紫金又
居寶溪上賣錫爲業一日輒語鄰曰我賣錫已三年
矣其與兒女食何多與父母食何其平與悉投錫於
溪攜妻子乘舟而去里人疑卽馬仙覘之舟忽躍入
雲中舉手笑別居傍有橋因名望仙居南有溪名仙
溪乃躍舟之所也明吳世濬詩云聞說仙翁馬自然
仙溪溪上住經年石橋南望溪如舊一片白雲何處
邊

國朝

沈一炳字谷音世居前邱幼年好道得龍門法錄于文昌閣莫之解遂遍遊天台終南諸大名山遇異人授三一經啟之乃道德經中庸多心經也遂得悟惟以誠敬爲功呼叱鬼神驅答魔怪雍正癸丑亢旱時師年止二十餘罔有知其術者師不忍膜視乃奮然起曰請嘗試之爰于清溪橋上設桌二三重跪赤日中默禱咬舌書符歷一時許有黑雲自東北來須臾甘霖大霑而當事者竟莫知之南陔柯煜立亭潘汝誠皆有詩贈家峩雪公有詩云奇哉一羽士濟物道心望睠此農氓苦血書籲上天赤脚曝日中喝死奚恤

焉一誠信足感竟得屏翳憐甘澍霎時足歡聲騰陌
阡贈詩有丹邱贊歎非徒然潘生念桑梓亦投鴉青
牋我田有負郭對之喜不眠濡筆遂誌之簷角猶潺
湲乾隆乙巳亢旱當事敦請祈雨甘霖隨至後坐化
于開化院面色如生

以上老氏

寶前兩溪志畧卷十

寶前兩溪志畧卷十一

歸安吳玉樹靈圃氏編輯

著述一

古人謂物之傳世有幸不幸書之傳不傳亦有幸
有不幸焉兩溪閒漢唐以上無可攷自宋迄今其
著作幾當充棟而所存者什不獲一此古人所深
慨者也今姑備志其名目其可攷者略附梗概或
亦供涉獵之一助云爾後之人倘得博採而兼收
焉則更幸甚誌著述

宋

綺川集十五卷 倪備

寶十一
綺川詞一卷

公字文舉紹興進士子倪思

易訓二十卷 倪思

易說二卷

大學辨一卷

大學僻解一卷

中庸集義一卷

論語義證二十卷

孟子問答十二卷

〔湖錄〕公於四書各有著述今皆不傳經鉅堂雜誌載
有詮解論孟數条稍見一班

壽皇聖政四卷

吳興志思爲吏部侍郎時訪修至尊壽皇聖帝聖政

特轉一官

昆命元龜說一卷

臺諫論二卷

合宮嚴父書五卷

掖垣詞章二十卷

繳論四卷

齊齋奏議二十六卷

厯官表奏十卷

翰林奏草一卷

銀臺章奏五卷

更化奏對錄一卷

遺奏一卷

〔湖錄〕公子祖常取其遺奏與魏了翁所撰碑銘及諡議彙爲一卷

兼山論著三十卷

兼山論著附錄五卷

兼山小集三十卷

齊齋甲集二十卷

齊齋乙集十五卷

翰林前稟二十卷

後稟二十卷

刀筆集十五卷

四六集十卷

承明集四十卷

南宮集一卷

些章二卷

詞科舊稟五卷

南正南轅詩二卷

近體樂府二卷

經鉏堂雜誌八卷

萬麻庚子郡人潘大復序

顏子一卷

子思子一卷

續曾子一卷

上三種郡胡志作倪思撰絳雲樓書目入偽書類

班馬異同考三十五卷

公以漢書多因史記之舊而篇章字句時有竄改因參合兩書證其異同以求史家筆削之意

四庫全書劉辰翁評點

遷史刪改古書異辭十二卷

書錄解題思以遷史多易經語更簡嚴爲平易體當然也然易辭而失其義書事而與經異者多不可以

無攷故爲是編經之外與他書異者亦并載焉

倪思史漢異同補評三十二卷 凌濛初

安陸唱和集六卷 倪恕

公字行甫淳熙進士倪備子

易說二十卷 倪淵

圖說一卷

易說序例一卷

吳興分類詩集三十卷 倪祖義

家傳六卷 倪祖常

言行錄三卷

家藏三朝宸翰一卷

倪文節公年譜一卷

書錄解題戶部郎中倪祖常字子武輯其父尙書遺事凡四種

丹陽集二十四卷 葛勝仲

丹陽詞集一卷

四庫全書目考論諸史喜閱釋氏藏經故其文博雅多禪理

太常因革禮三百卷

方輿別志二十卷 葛立方

西疇筆耕五十卷

歸愚集二十卷

歸愚詞一卷

韻語陽秋二十卷

葛邲文集二百卷 葛邲

詞業五十卷

信齋詞一卷 葛剡

警心易錄六十四卷 孟琪

易贊

忠襄公拒敵平金屢建奇功退居軍中恬然若無所
事集古今易說折衷之每卦各繫以辭辭四句名易
贊有謂公兵法得之於易

孔子編年五卷 胡仔

漁隱叢話一百卷

自序云投閒二十載心無所事因網羅元祐羣賢詩話纂爲六十卷自謂已略盡矣比官閩中歸苕溪又獲數書其間多評詩句遂再采摭因而擴收羣書舊有遺者及余聞見有繼得各附益之釐爲四十卷前後共一百卷云云

此書乃繼阮閱詩話總龜而作故閱所載者皆所不錄

建炎避亂錄 胡舜申

懷蘇集一卷 賈收

〔府勞志〕收與東坡最契東坡去後收念之不置築一

亭匾曰懷蘇常作詩寄懷彙爲懷蘇集

東坡詩註四十卷 施元之

公字德初宋時人以文學著聲試館職除起居舍人
遷左司諫案郡邑志俱作長興人而施氏子孫相傳
世居寶溪以長興籍應試故入長興邑志云

會稽志二十卷 施宿

元

衡胡集 孟洵

圖繪寶鑑 夏文彥

古今畫論一卷

明

歷朝史譜十卷 吳璋

擇日易覽四卷

居家節要一卷

〔高臺安素公墓誌銘〕公字汝敬號安素生岐嶷聰警不凡樂善好施慷慨自許嘗刻歷代史譜擇日易覽居家節要等書以廣其傳

竹軒集 吳鳳

〔吳氏詩存〕公字九韶號竹軒邑庠生入太學往來畱都與大司馬甘泉湛公學士惟東姚公咸稱忘形交選光祿署丞後拂衣歸與劉南垣蔡白石茅鹿門孫屏石結契多所吟詠

郡縣方輿沿革十五卷

案府志作郡縣地理沿革

吳龍

士林珠玉四十卷

士林珠玉續集十卷

怡情漫詠十卷

顧應祥序云公在滁時考覽古今圖誌著方輿沿革又集士大夫過從倡和投贈諸作爲士林珠玉五十餘卷所自著有怡情漫詠殊有天趣

園林後記九淵家前邱工詩日與騷人韻士爲詩酒之歡著怡情漫詠

白門詩草六卷 吳仕詮

謝陞序云今稱詩者多在南都而其沈潛溫厚庶幾

寶十一
賢於昔者則公擇爲冠

烏程縣兩朝實錄備纂四冊

〔湖錄〕天啟初纂修萬厯泰昌兩朝實錄行下郡縣開
造各項事宜題申館局以備纂輯此四冊得諸傳是
樓借觀每葉皆有印縫卷首有呈詞云湖州府烏程
縣副貢副總纂吳仕旦

前溪人

縣學生員閔元化沈清

遠備將該縣各項應纂事宜遵照來文逐一載述其

四本呈送伏乞上裁

射堂詩鈔十四卷 吳夢暘

北海集

閩觀詩略

陳繼儒跋云先生獨行類鴻漸奇策類鴻客隱類鴻
乙餘事乃作詩人耳

柯煜序云公詩入於陶謝李杜之間獨有俊爽拔俗
之概讀之渾浩流轉若瞬息千里而不知其攻苦斟酌
夜不交睫也

憩棠造士錄 吳仕昂

寄傲吟

國事譚林 吳世熙

清溪論草

〔府志〕世熙字緝侯號羣玉生穎異十歲能文下筆灑
灑千餘言立就無他嗜好於古人書無所不讀往往

寶十一
與之批駁必根極其人而止生平饒奇韻而無俗情
一時藉藉藝苑咸稱爲談詩匡鼎萬厯癸卯始從成
均上公車凡三別竟此僚不獲信而逝

夢蓮草四卷 吳世美

越遊小草

〔吳氏詩存〕公字叔華其詩端莊流麗而秀傑可愛晚
年留心釋典故與高僧唱和居多

禦寇始末二卷 吳世濟

公字楫侯任太和令邑爲河南之衝時流寇縱橫公
多方禦守斃紫金櫟於城下書中所載甚詳

細陽雜詠

易解

易白

春秋解

性理闡幽八卷 吳時憲

畫餘草四卷 吳筠

泌可堂文集十卷 吳時亮

蒿城集□□卷 嚴廷儀

菁山集□□卷 施侃

國朝

在庵文集十卷 吳易

日用身儀十四卷 吳最

公字人伯號六有甫脫襁褓就塾讀大學卽問正心誠意大旨師奇之後博貫經史著作饒富是編取六經并諸賢語列爲立坐行跪拜視聽容貌聲音言語飲食衣服寢息雜儀通論計十四條後附諸家註解閔圻申校定張履詳序

宋儒五子文讀

朱子纂要析疑

陽明語辨

傳習紀疑

性理纂要錄二卷

朱心跋云此書亡友吳人伯所纂前後分二集其一

曰微言多採先儒精微之語通于性命之原者引人於思也其次曰明言則採先儒死生鬼神之論釋氏之辨所以釋疑而解惑也予因錄之統其名曰性理纂要

俠編十卷

是編採歷代史書并古今野史百家起自伯夷叔齊至明建德樵夫及王維禎之馬金華丐之猴計一百五十餘篇自著俠說其略曰大凡任俠易認俠難認俠易養俠難無故而號于人曰誰敢侮我知其遇敵而卻走矣荆卿之于句踐也嘿而逃去子房之于老人也跪而納履淮陰之于少年也出其跨下誠認之

寶十一
確而養之深也是故無事而思俠則狂矣既事而思俠則挫矣不審其初終則謬矣必審其初終則餒矣出乎至性發乎自然主乎禮義識若止水心若鑑空夫如是謂俠夫如是謂真俠又立取俠意八條自註曰不言凡例而言意者俠無定局若以例概之非俠也其夷齊傳後論曰伯夷叔齊古今第一對大俠也讓國而逃毫無濡忍毫無芥蒂何等慷慨何等決絕非俠而何至其扣馬一諫西山一餓尤極剛烈那時九州四海從風而靡獨此二子子然以君父二字聲大義於軍前想見武王此時直是羞慚無言左右欲兵之沒法打發他也太公止之手提不起刀切不下

也真奇男子真烈丈夫云云其餘概可見

藏山文集六卷 吳磐

藏山遺詩四卷

張溥序

南山堂自訂詩十卷 吳景旭

南山堂續訂詩五卷

歷代詩話八十卷

〔四庫全書目〕統論歷代之詩起三百篇下迄明季分

爲十集每條先列舊說于前而雜引諸書以互相參

考其舊說所無者列本詩于前附己意于後取材宏

富嗜奇愛博上可比肩漁隱叢話近人詩話無出其

右也

詩樸 吳晟

鶴芝堂文集

南村詩集 吳景鄴

公字赤一號南村司空孫岷瞻雅慕公延之京邸凡
奏疏皆公屬草生平肆力于古文深厚醇茂得南豐
風格詩簡淡有遠致尤喜集杜其於孝弟忠信如飢
不忘食渴不忘飲讀其詩文可知其人也

徐倬序云鏟華存實得力在柴桑浣花之間

有是山詩藁 吳溥

朝爽堂集 吳景尙

結緣軒詩集

徐倬序云鹿門朝川閒當置一座

靜遠堂集 吳景郁

行路吟 吳兆英

公字孟王號蒿廬穿穴子史名振京都遊燕齊秦隴
偏歷名山大川自題其橐曰行路吟南安太守盧豫
爲之序有行路難六章慷慨悲憤古今絕唱

橘莊詩橐 吳景懷

費民遵序云公詩不循常格不襲前人自寫性靈者
也

望嵩樓藏書目 吳啟思

公字睿公號念庵幼慧好學家藏萬卷無不畢覽下
筆千言立就所著書目惜未付梓其考訂精核直追
古人嘗遊京師名公皆願與交外舅海昌陳相公素
庵欲爲公援例速仕公曰貲郎不可爲固辭之

望嵩樓詩橐

望嵩樓詩餘二卷

馮雲驥序

旅遊草

申涵光序

蘋州詩集

吳氏詩存公爲詩揣摩三唐而與少陵冰解乳合後

尤愛劔南之澹蕩不肯拾近代七子唾餘步趨時好
故華處能老樸處能厚感慨處能留餘豔羨處能爾
雅

使交集 吳光

嚴沆 嚴我斯序

康熙三年有安南之命 特簡公奉使有使交集蓋
從發都門以至使旋之作其閒敘歷山川或留連謠
俗或憑眺往蹟或陳切時懷悉符風雅奧而彌揚洵
輶車之采烈宏城郭之方聞者已

澹巖詩草 吳啟佑

嚴禹航評云發唱清挺屬詞遐曠其氣宏以舒其情

和以厚其音節慷慨而嘹唳

百屏詩集 吳啟宗

公字汝翰幼以英敏聞尊人直愚公鞏積學厲行家
奇貧日課公五千餘言薄暮背誦少誤輒加呵責中
康熙壬戌進士有制義文彙行世其詩集仇少宰兆
鰲序

吳喆四卷 吳啟袞

漱芳詞

沈涵序

公字匡期號山補與西泠邵戒山清溪徐冀村竹溪
沈懷庭心齋諸君子結社茗上號華萼十三子而公

獨以明經老壽八十二易簣前數日始授武義學訓
導

永亭漫藁 吳允

祥桂軒吟 吳靜

書窗閒草 吳重光

公餘草一卷 吳曙

陸師詩云聽說商河令新成雀髮翁勸耕愁土瘠祈
穀慶年豐興落公餘筆詩陳大國風言言勤撫字痛
定憶江東

日下吟

叢芸館詩存

柯煜跋云有似子美者有似子瞻者至於俯仰揖讓
風神意度宛然香山後身也

北遊小草 吳履中

楚遊吟

易宮四十卷 吳隆元

取邵子詩三十六宮都是春之義上下經各十八宮
爲三十六卷繫辭說卦序卦諸傳共四卷

讀易管窺五卷

以河圖洛書可正可側立 四正四隅圖實爲前人
所未發言太極參以中庸性理之理以明象數末卷
專論占例

中庸管窺

孝經註疏

參同契註解三卷

金剛經註

易齋詩藁

公直介剛毅經濟宏才作詩乃其餘事也詩極組織而仍不傷雅不入纖一歸溫厚和平之旨惜藁皆散佚所存十不二三耳有太史時文集易齋時文集行世

吳氏詩存 吳啟褒

自序云我吳氏自後周左宣教郎諱翦公居歸安射

村旋遷洧安雲村傳十五世桂屏公復自睦遷湖之
前邱迄今四百餘年以孝義開基以詩書樹業雖有
廊廟山林之異其發爲悲愉憂喜之音要皆根乎性
抒乎情止乎理義者也歷年既久散佚甚多或巨製
鴻篇已經刊布者不無昆明劫火之嗟或單詞隻句
見諸掌錄者亦屬魯國靈光之跡不重加搜輯坐使
流風遺韻當吾世而湮沒其何以佑啟後昆某久有
志自慚學識淺陋逡巡未逮今年踰古稀斯事恐不
可緩數年來殫心採掇訂其蟬食理諸蠹餘每見先
人片言不惜老眼昏花敬加繕寫各爲小傳以著其
崖略非敢自謂無憾也其有遺漏更望吾宗同志相

與存補以完一家之文獻於四百餘年之遺澤實重
有賴云其凡例有云或因詩以存其人或因人以存
其詩故名詩存云云

吳興田賦考四卷

茲編乃我大父數十年心力而成者也專論烏程歸
安德清三邑田賦浮糧稽考歷代定制并稅銀稅物
之由至宋賈似道之公田元之皇莊開浮賦之端又
籍朱清張暄田歲依租輸稅明太祖憤張士誠一人
酷加重賦於三邑藉諸豪族田案租入稅加徵之多
寡自明迄我 國朝耗截之額款 列聖之恩減源
委詳明考訂精確又備錄疏奏呈詞利弊民隱臚陳

各款瞭如指掌實有重賴於三邑云

附章有大書

養病懶出久不侍警教於左右凝松一晤忽又兼旬
承示吳興田賦考一編備悉源流臚陳利弊考据之
精籌畫之細仁人君子之用心爲無窮也藏之名山
以俟有力者採錄入告億萬生靈百世賴之矣恐遂
遺失謹歸鄴架帙繁未能手鈔容俟異日再請可耳
章有大頓首

半舫齋文集四卷

泊宅詩話半舫齋詩如散聖安禪自然閒逸又如明
漪絕底天葩初胎不假鉛華而真態自足杭堇浦太

史目之爲臨川支裔彭澤別子蓋不虛美云

閩遊草

南遊雜記二卷

自序云吾浙山水之雄麗唯錢塘以南爲最余常思遊而未遂今年春放棹於武林之源渡胥江歷富春巖瀨登桃花洞之巔探下河石門之奇尋龍湫雁宕之勝泛舟於甌江至閩首之長溪而止凡可喜可愕之事目之所寓耳之所聞風土物產莫不率意以爲之記

後附諸名士題贈二卷

大學心編一卷

檢身要編三卷

沈棠臣序云此公年高德邵閱歷所得有會于心纂集格言貽爲切訓者

釋氏源流提要四卷

起自佛入中國迄我國朝分宗各派禪師小傳及問答禪機註解諸經要語採錄諸家語錄一歸正覺不入頑空眞釋氏之梯航也

寶前兩溪志畧卷十一

寶前兩溪志畧卷十二

歸安吳玉樹靈圃氏編輯

著述二

大學筆講 吳湘

中庸筆講

莊子正義八卷

屈子正義六卷

黔陽三案錄 吳大燾

重宴鹿鳴題贈詩文集十卷

菽齋公諱大燾字青然康熙丙子舉人乾隆丙子重
宴鹿鳴諸公賦詩以贈甚富沈榮仁撰記孫人龍跋

萬里謠 吳鳴虞

中林集

田歸吟

續吳興詩話公詩清雄雋拔著有萬里謠大約取法少陵而能自見神力不減漁洋蜀道集也罷官後著有歸田吟則又宛然一放翁面目矣

敬業堂詩 吳啟敬

汗漫集 吳來佐

唐宮詞百首

詠史詩一卷

雪齋詩草十卷 吳曾

公字因其太史吳光子沈酣典籍溢爲詩歌裁對精工不傷氣骨其懷古詠物諸作皆卓然可傳

夢庵遺藁二卷 吳元槐

沈操堂題其後曰清醇流麗上可追劉文房錢仲文次則平揖石湖射的斐然成一家言茲編雖其一轡亦可見其學之有根底矣

落萍草 吳聯奎

蚓竅集 吳椿齡

續吳興詩話公字古年又字果園邑廩生詩才雋拔有擬江文通雜體詩三十首神采面目直逼古人又有和蘇歸去來詞集字十首幾與坡公相埒年未三

十而殀人咸惜之

節孝詩文前集八卷 閨秀吳閨貞

後集八卷 鍾伯敬序評

節孝爲駕部吳仕詮女適溫子孟字伯生早孀

湘煙詩集 閨秀陳芬

閨秀爲海寧相國陳素庵孫女字湘煙有才藻善屬文適吳元晉字受臣

萬卷樓詩彙 閨秀吳受竹

先姑受竹老人少穎敏好學爲大父峩雪公鍾愛長適東泊潘公汝誠字榕堂乾隆丙辰進士歷任知府子本信任瀏陽知縣鷺丁未進士三封宜人兩封恭

人詩文甚富唯萬卷樓一集行世

葭濱草 吳官

公字葭濱後改名萃詩爲姜虬綠點評

心經註 吳穀

以大學明德止善之說參合成一家言

臥滄吟七卷 吳聯珠

世守錄三卷 吳發祥

採錄吳氏歷代世系及雲村杜塘前邱分支源委并

涓安各祖墓圖

梅莊詩文集 吳士俊

晚香圖記十二齣

名醫類辨

公字邁常性嗜酒喜讀書每當酣飲時下筆千言立就其晚香圖曲一部上可追賈甫東嘉平揖南柯紫玉又精通醫卜著有名醫類辨十數卷惜散佚不傳

季常詩藁 吳最良

六壬彙十卷

醫林纂奇

醫方正誤

佩韻示斯 吳清藻

嘯湄集

溪壺吟

秋窗吟

覲光集二卷

公字暎乾號嘯湄弱冠以詩學著聲吳下乾隆 聖
駕南幸獻詩賦有覲光集二卷性靜默廉介日惟閉
戶吟詠著作饒富年八十三

星平彙纂十卷 吳文奇

說文分韻四卷 吳升恆

撫古遺文一卷

古篆彙集一卷

杏園小草

了不閒棋譜

昌國往來集 吳灝

菱溪草

黔遊吟

吳氏詩徵 吳昭融

題襟集 吳陳爻

山房文集十二卷 吳大受

詩筏一卷

五音六律圖考一卷

五代史纂誤補四卷 吳蘭庭

南雪詩草四卷

族譜彙存二卷

胥石傳公字虛若號胥石所爲詩文大都寄名他氏
所自著書則有五代史纂誤南書詩草族譜稟存餘
多燬於火無復存者

家世提要補四卷 吳綸

壽谷家訓三卷 吳坊

十三經異同音釋考 吳芳綺

白蘋草廬稟

鐵崖詩餘

是山居倣古印譜 吳鯤

是山居詩稟

師意編 吳寶樹

北梅書屋自訂詩藁 吳敬庭

閩山詩 吳岡

叱靈集 吳玉樹

自序云吾族祖人伯公輯俠編有取俠意八條自註
曰不言凡例而言意者俠無定局若以例概之仍非
俠也又曰俠有三識力膽是也缺一不可余有取以
讀詩夫詩道性情耳未發之前不能下一字已發之
後不能易一字若必思而後發則詐矣發而求工則
窒矣目遇成色耳得成聲其發也如飄風急雨如輕
車駿馬又如毒龍攫海千態萬狀莫可端倪故讀是
詩者醉可醒怒可喜鬱可舒雖有可叫可罵處無可

出口有可痛改痛剛處無可下手其非出乎至性發乎至情者能之乎茲編起自漢魏迄於國朝里語童謠不拘常格其柔婉精巧清盈豔麗者概不入選

三李齋效顰草

嘯湄老人評云筆致蒼勁語意奇橫詢屬詞壇猛將小壺居士評云耀明珠蔭桂旗麗矣或拘袂隨風如欲仙去或遺世獨立橫絕一時此數語可以移贈人曰專宗昌谷我不以爲然

晚椒評云讀之一過飄飄有凌雲之氣蓋非人力所能爲者豈可以尋常繩尺限之求之古人中唯太白有此意境長吉非其倫矣

聖經翼二卷

醒世真言

採掇神仙語妙明養性修身之至理辟佛家頑空斥道流丹術以示三教正宗

前邱志一卷

輯譜彙餘二卷

蕉散人題畫

續吳興詩話 吳又祿

以戴太常吳興詩話所載寶前兩溪閒人僅有官爵名號而詩則未備且有沿誤處因倣其體補正之先錄原編於前附所補詩於後兼引雜書考訂葢亦彙

太常所未逮也

吳氏詩存續編

王元文撰前序孫士毅撰後序

吳氏文存 吳鸞坡

文存一集乃吾族姪鸞坡字志鴻所訂也志鴻少孤而貧性廉介不苟取好學寒暑無閒採吾吳氏自明迄於國朝四百餘年之制藝編輯成帙歲入館資悉付梓氏而炊煙時絕衣不掩形怡然不改其志第卷帙浩繁未竟而卒年四十一

吳玉樹文存續序云族姪鸞坡集吾吳氏制藝一千有餘首初名延州文萃改名吳氏文稿後又易名文

存甫壽棗梨鸞坡病故而後未聞有繼是舉者族姪
名晉嘗與余語余因家譜未修何暇於文固未遑也
迄今甲子名晉死已八載鸞坡死已十有餘載矣余
深憫悼鸞坡之貧且益堅未遂其苦志名晉好學而
不永其年余有負其生前之囑因搜訪遺秩悉皆散
失無復問矣止存付剞劂者二十三首而已悲夫昔
吾先大父峩雪府君集吾吳氏五百年之詩得四
十卷或因人以存其詩或因詩以存其人命名曰詩
存今文存之命名亦是義歟而人之足可存者固不
必以詩文詩文之足可存者固不必問其人彼自足
可存而存者也然不知皆由人之成其存也不然文

存一千有奇首鸞坡死未二十載止存二十三首其
九百有餘首誰其亡之余嘗爲續學博雅而沒世不
稱者所大痛也余又痛二十載後并此二十首亦將
亡之矣特爲採拾文之存者或曾取重于當時或焚
餘于篋底者敘而存之并勗吾後人奕世相存亦斯
文之一助吁余五歲入學九歲讀孟子未竟而患癖
疾不復入學堂矣二十已後病稍愈每見諸叔兄誦
讀心竊慕焉時於戶外聽之不倦或遇能解處不覺
手舞足蹈人皆笑之亦不知其譏我也故字不多識
至於制藝尤所不通茲集唯取昔之存者而存之其
推敲甲乙有待伊人固非余不識字人所能參贊者

也

姑存草二卷 吳小同

老子註四卷 吳珠樹

採中庸性理之義程朱邵子之說旁及內典諸書參
合成言

按摩法 八卷

自序云按摩始於黃帝漢書藝文志有黃帝岐伯按
摩十卷後漢張仲景金匱曰四肢才覺重滯卽針灸
按摩勿令九竅閉塞是漢時其法猶存自晉以來名
醫輩專精于湯液按摩書亡而法廢今時閒行之小
兒竊概古法云亡推原內經臨驗病症詳明經絡輯

若干卷亦未必非醫道之小補云

周易變卦圖說 四卷

說宗朱子學本漢儒補本義之闕遺圖爻象之義明
往來之數陰生陽長之理陰自陽自之別

驗舌論機二卷

驗法十六則極爲精細足稱醫學指南

周易卦氣圖說 四卷

說以文王後天六十四卦圖配以春夏秋冬星辰躔
度元運推轉治亂盈虛之應又演干支納甲極卦氣
之變明陰陽往來五行生尅之機

周易消息圖說 二卷

宗鄭康成伏羲十字易乾坤震巽坎離艮兌消息之
說辟卦候氣京房八宮原本消息揣意推求漢學一
卦消息三十六反對七十二極每卦消息計有一百
四十四云

延州倡和詩集

北海吳夢陽原唱新春試筆寫懷詩四首前後和韻
者赤一吳景鄴在升吳階子望吳景尙斯潤吳疊右
李吳郿睿公吳啟思匡期吳啟袞象先吳啟永峙青
吳曙峩雪吳啟襄揚存吳啟震星來吳鰲惠疇吳亮
艮年吳位思約宜吳聯奎揚烈吳發榮山簣吳廷玉
開殷吳發祥邁常吳仕俊

原名
遇春

季常吳最良魯傳吳

超羣玉衡吳振宗錦章吳元綱介眉吳芳年共二十
四人得詩一百二十首

流香閣倡和詞

孫在豐序云蘋村先生客春過吳陵余時往來周旋
匝月今年秋復挈吳子匡期拏舟而來過吳陵者再
余僦居公廨人事雜沓先生適抱清恙憩足於俞錦
泉內翰流香閣中不數日霍然去體興會所至偶賦
百字令一首俞子陳芳爲錦泉哲嗣夙負雋才遂與
匡期更唱迭和先生亦喜爲之盡態極妍出奇鬪險

各盡其致一時名彥如孝威

鄧漢

仙裳

黃赤一

吳景

季守

王待

墨書

繆肇

諸子皆起而和之共爲一帙遂成

寶十二
勝觀云

雙溪倡和詩六卷

竹墩前邱相望不二里許心齋沈涵芸齋吳曙同諸
名彥結雙溪詩社詩爲徐蘋村倬選得古今體四百
六十四首其倡和者爲心齋沈涵芸齋吳曙厚餘沈
樹本青然吳大燁繹旃沈炳巽幼牧沈炳謙素庵沈
允相麀仲沈楷世寅御沈炳震植庭沈樹槐楨國沈
同叔南陔柯煜琳巖吳斯沼眉宗吳溶靜山丁凝孟
誠姚至德山補吳啟袞端文沈揆曾易齋吳隆元殿
擎沈柱臣貞裳柯壽坤古千巖光夔逸羣茅應旦渠
眉茅應奎裘雪吳啟襄立夫孫爝翰飛董浩樵雲朱

廷傑周池董胡駿得二十九人何義門序之蘋村復
序之又柯南陔序最佳載入吳興詩話

巴辭草 沈珠霖

九魔子百壽印譜

豐澍堂家傳詩文集

是編先君杏園公所集也始于韓純玉吳興三君子
傳畧三君子者爲茗柯凌義渠寶忠溫璜高祖湛存
公諱時也并曾祖以下行述傳誄祭文得十二篇曾

祖母溫孺人八袞壽詩爲張玉書諸名彥得七十人

古今體詩八十三首赤一公諱景滄浪圖題贈爲嚴

我斯諸公得□百□十□人古今體詩□百□十□

首先大父峩雪公

諱啟

灌菊圖題贈及南遊雜記題

詞爲徐倬柯煜諸公得一百三十三人古今體詩二

百七首又壽輓諸贈詩得二十六首後附翠映樓諸

作錄成二帙題曰家傳詩文集云

十快題贈詩文初編

十快爲畫癖詩魔酒豪書顛睡
禪梅逸棋癡劍俠竹主茗仙

王圻蕉散人十快傳云散人姓吳氏名玉樹字靈圃

年十歲病瘵五年不愈讀朱子大學集註有會於養

身之要閉戶經年而痊好吟詠喜談神仙之術畫學

松年衡山竹石離奇酷似與可書摹懷仁聖教清逸

逼真賦性豪宕慕義行仁植蕉數十本於園中藥爐

茶鼎濡墨揮毫優游於蕉影之間人咸呼爲蕉散人

散人因之以爲號也遂有散人十快之目其族兄坊
字封三績學士也作十快制義吳下諸士爭相吟詠
以贈余聞之深快散人之能自快其快以快人也時
過小齋余每款飲飲輒醉醉必豪下筆縱橫灑灑倚
馬待嘗論孫子兵乃詭道之說曰夫用兵仁義禮智
信勇缺一不可若以詭待下則下何能爲用以詭示
天下則天下何能服非詭焉藏也衣錦綉衣裳錦綉
裳良賈若虛大智若愚此之謂與吁余但知散人畫
之癖詩之魔書之顛爲三絕又知梅竹怡情茗棋自
樂北窗高臥仙乎禪乎其曰俠吾意其誣也今聞論
孫子語散人其奇男子矣惜其質弱善病未能見用

於世嗟乎豈天之將藏散人耶抑散人將自藏以永其快耶

訪宗錄二卷

吳玉樹
敬庭

吳玉樹序云我吳氏自唐季居湖之射村旋遷淳安之雲村至元桂屏公復遷湖之前邱遂分歸安淳安兩支淳安自爲譜而歸安之譜以祖桂屏公爲第一世所載事蹟亦自遷後始自明初水村公至 國朝雍正間菁陽公凡七經纂輯嘉慶丙辰冬奉嚴君命創增修之議始於明年丁巳之春凡遷徙各處必加謹訪求不敢稍有怠志東至海濱南至江干北越具區西歷餘杭故鄣登山涉水宿露餐風無閒寒暑者

兩匝歲其閒族人遷徙之源委窮通得失之變易績
學幽芳之侵失卒葬事蹟之異同村姬野老之傳聞
山僻村落之遠近凡有可悲可喜者莫不記之歸而
告諸宗長錄成二卷命曰訪宗錄非欲自昭敬宗收
族之心冀後之復是舉者得有所稽考

寶前兩溪志畧卷十二

寶前兩溪志畧十二卷歸安吳玉樹撰玉樹字臨夫太
學生所居樹蕉數十本又號蕉散人寶前兩溪間有射
村宋太平興國七年析烏程東南十五鄉爲歸安縣議
卽其地築城爲縣治因費鉅中止至今與烏程同爲郡
治附郭寶前兩溪旣隸歸安是志卽斷限於析治之始
故於宋以前事多略分山川園林津梁寺觀祠祀人物
藝術釋老著述九門纂言紀事約而能該詳而不濫地
志之善者自來志鄉鎮者稱宋人常棠所撰澈水志爲
最善 四庫目錄謂其體例謹嚴藻不妄抒明韓邦靖
朝邑志爲世所重卽取法於常作今觀此志猶存前哲
槩獲後有作者可酌取焉吳氏世居前溪與竹墩沈氏

代爲姻亞兩姓多文雅之彥軒冕相襲里人沈樹本詩
前溪燈火接比鄰親串招邀往返頻數遍門風孰王謝
圖將嫁娶並朱陳可以想見其地風物之美嘉慶時曾
有刻本今原版無存漁川觀察謹守世澤以家藏舊本
見示亟刻之以存鄉邦文獻壬戌天貺節吳興劉承幹
跋